

عارف يا رب

ممکن يا رب من غير إساءة أدب
أو اعتراض ع الحكم
أو حتى من باب علم
يجيلي ابويا ف حلم
يشرح لي كان ازاي بيكفي بيت وعيال
ويراضي في المساكين
وبيعدل المايله بفتات لحبة مال؟!!

ممکن يا رب تبذل الاحوال؟!
وتقوله راحة البال ضاعت في يوم ما مشيت
نص الحيطان في البيت بتجيب في برد عليل
والقرش لسه قليل رافض ثبات إيدنا
ممکن يا رب الجرح دا يسيينا؟!!

عارف يا رب
الناس بتحسدنا
على ضحكنا الزايف
على قلبنا الخايف من بكره وامبارح
عارف يا رب البُعد كان جارح
لامى البريئه وطهر ضفايرها
عارف يا رب
الدنيا كات هي واتقسّمت أيام
واتجمّعت فينا دعوتها تهدينا
لقلبها الصالح
امى حصان رابح فى سباقنا للدنيا
امى السما التامنه
كراييج حنانها يعيد..
نشوتنا للأشياء
ضحكتها ليل مشتاق يسرق جناح من طير
ويغازل النسّمات

عارف يا رب
كان ليا ست اخوات
عنقود همومهم فرط
غرق قلوبهم شوك
عارف يا ربي
كلهم حبوك وشافوك في ضحكة «نور»
عود البخور الحور
ضحكتها تروي البور وتعيده كله خضار

عارف يا رب النص دا جبار
علشان بتذكر فيه
علشان كتبتة جواب
يوصل بدون أسباب
حتى ان قفلت الباب
ف انا قلبي مفتوح لك
هيعيش وهيبوح لك
وهيحكي ليك همه
والسجده هتضمه وهيبكي ليك بخشوع ..